



REPUBLIKA E SHQIPËRISE

**KOMISIONERI PËR TË DREJTËN E INFORMIMIT
DHE MBROJTJEN E TË DHËNAVE PERSONALE**

Nr. 244/4 prot.

Tiranë më 01.03.2018

REKOMANDIM

Nr. 06, datë 01.03.2018

MBI

ZBATIMIN E LIGJIT PËR MBROJTJEN E TË DHËNAVE PERSONALE.

Baza Ligjore: Ligji nr.44/2015 "*Kodi i Procedurave Administrative të Republikës së Shqipërisë*".

Ligji nr.9887 datë 10.03.2008 "*Për Mbrojtjen e të Dhënave Personale*" i ndryshuar, nenet 30, 31 dhe 32 të tij.

Në zbatim të Urdhrit nr.44 datë 30.01.2018 të Komisionerit për të Drejtën e Informimit dhe Mbrojtjen e të Dhënave Personale, u krye hetim administrativ pranë kontrolluesit Studio Përmbartimore "KREON" sh.p.k. -
, me objekt kontrolli:

- Zbatimi i Ligjit nr.9887 datë 10.03.2008 "*Për mbrojtjen e të dhënave personale*" i ndryshuar dhe akteve të miratuara nga Komisioneri, në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit të kontrolluesit Studio Përmbartimore "KREON" sh.p.k. -

Në funksion të Ligjit nr.9887 datë 10.03.2008 "*Për mbrojtjen e të dhënave personale*" i ndryshuar, Zyrat Përmbartimore Private janë kontrollues të cilët mbledhin dhe përpunojnë të dhëna personale për kategoritë "*punonjës*" dhe "*subjekte të dhënash*" për të cilët është marrë vendim ekzekutimi.

Kontrolluesi Studio Përmbartimore "KREON" sh.p.k., është subjekt juridik me NIPT: L21303504J dhe objekt aktiviteti "*Shërbim përmbartimor privat*".

Kontrolluesi, në ushtrim të detyrës së tij, ka kryerjen e shërbimit përmbartimor privat gjyqësor dhe konkretisht ekzekutimin e detyrueshëm të titujve ekzekutivë, në rastet e përcaktuara në Kodin e Procedurës Civile.

Përfaqësuesi i kontrolluesit u njoh me Urdhrin nr.44 datë 30.01.2018 të Komisionerit dhe u tregua bashkëpunues me grupin e inspektimit.

Nga hetimi administrativ i kryer pranë këtij kontrolluesi sipas procesverbalit të mbajtur për këtë qëllim në datë 14.02.2018 u konstatua se:

1. Kontrolluesi ka "Njoftuar" Zyrën e Komisionerit në lidhje me përpunimin e të dhënave personale. "Njoftimi" është kryer nga kontrolluesi në vitin 2013, sipas verifikimit në regjistrin elektronik të Subjekteve Kontrolluese pranë Zyrës së Komisionerit.
2. Kontrolluesi disponon rregullore për "Mbrotjtjen, përpunimin, ruajtjen dhe sigurinë e të dhënave personale" si dhe ka nënshkruar "Deklaratë Konfidencialiteti" me punëmarrësit të cilët kanë akses në mbledhjen, përpunimin dhe ruajtjen e të dhënave personale.
3. Kontrolluesi mbikëqyr hyrjen në ambientet e brendshme nëpërmjet sistemit të video-vëzhgimit (CCTV). Në hyrje të ambienteve të kontrolluesit janë vendosur tabela informuese mbi prezencën e sistemit të video-vëzhgimit (CCTV), por ato nuk janë në përputhje me formatin standard të miratuar në Udhëzimin nr. 13 të Komisionerit;

Konstatimi përbën shkelje administrative të nenit 18 të Ligjit - "1. Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen të dhënat personale, për personin që do t'i përpunojë të dhënat, për mënyrën e përpunimit, përveç rastit kur subjekti i të dhënave është në dijeni të këtij informacioni. Kontrolluesi duhet të informojë subjektin e të dhënave për të drejtën për akses, si dhe të drejtën për korrigjim të të dhënave të tij."

Informimi i subjekteve të të dhënave të cilët aksesojnë ambientet e kontrolluesit realizohet në mënyrë të plotë nëpërmjet tabelës informuese sipas modelit standard të miratuar nga Komisioneri me Udhëzimin nr. 3 datë 05.03.2010 "Mbi përpunimin e të dhënave personale me sistemin e video survejimit në ndërtesa dhe mjedise të tjera".

4. Kontrolluesi nuk ka publikuar "Politikat e Privatësisë" në portalin zyrtar <http://www.studiokreon.com/>.

Konstatimi përbën shkelje administrative të nenit 18 të ligjit - "1. Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen të dhënat personale, për personin që do t'i përpunojë të dhënat, për mënyrën e përpunimit..."

Çdo kontrollues që përpunon të dhëna personale, pavarësisht faktit nëse përpunimi bëhet në mënyrë elektronike apo manuale dhe pavarësisht nëse mbledh apo jo të dhëna personale nëpërmjet portalit online në internet, ka detyrim që të publikojë "Politikat e Privatësisë", pasi kontakti paraprak i çdo subjekti të dhënash, realizohet nëpërmjet portalit zyrtar të kontrolluesit. Publikimi i "Politikave të Privatësisë" përmbush më së miri qëllimin që ka neni 18 i Ligjit nr. 9887 datë 10/03/2008 "Për mbrotjtjen e të dhënave personale" i ndryshuar.

Në përfundim të procesit të hetimit administrativ, grupi i kontrollit hartoi proces verbalin i cili u lexua në prani të palëve. Përfaqësuesi i kontrolluesit nënshkroi këtë akt duke mos paraqitur komente.

Zyra e Komisionerit, mban në konsideratë faktin që kontrolluesi ka qenë në bashkëpunim serioz me grupin e hetimit administrativ gjatë ushtrimit të kontrollit.

Sa më sipër:

Në zbatim të neneve 18 dhe 32/1 të Ligjit Nr.9887 datë 10.03.2008 "Për Mbrojtjen e të Dhënave Personale" i ndryshuar.

REKOMANDOJ:

1. Kontrolluesi Studio Përmbarimore "KREON" sh.p.k. -
në zbatim të nenit 18 të Ligjit nr.9887 datë 10.03.2008 "Për Mbrojtjen e të Dhënave Personale" i ndryshuar, të informojë subjektet e të dhënave personale mbi prezencën e sistemit të video-vëzhgimit (CCTV) si dhe ushtrimin e të drejtave të tyre në raste çenimi, nëpërmjet tabelës informuese sipas modelit standard të miratuar nga Komisioneri me Udhëzimin nr. 3 datë 05.03.2010 "Mbi përpunimin e të dhënave personale me sistemin e video survejimit në ndërtesa dhe mjedise të tjera".
2. Kontrolluesi Studio Përmbarimore "KREON" sh.p.k. -
në zbatim të nenit 18 të Ligjit nr.9887 datë 10.03.2008 "Për Mbrojtjen e të Dhënave Personale" i ndryshuar, të publikojë Politikën e Privatësisë në portalin zyrtar <http://www.studiokreon.com/>.
3. Kontrolluesi Studio Përmbarimore "KREON" sh.p.k. -
të realizojë plotësimet e detyrimeve të parashikuara në këtë Rekomandim, brenda afatit 10 ditor nga momenti i marrjes dijeni.
4. Në rast mos përmbushje të këtyre detyrimeve, Komisioneri vepron sipas nenit 30/2 dhe 39 të Ligjit nr.9887 datë 10.03.2008 "Për Mbrojtjen e të Dhënave Personale" i ndryshuar. Komisioneri në rast shkeljesh serioze, të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të moszbatimit të rekomandimeve të tij, vendos sanksion me gjobë për kundërvajtjet administrative dhe e denoncon publikisht ose e raporton çështjen në Kuvend dhe në Këshillin e Ministrave.

Ky Rekomandim u shpall sot më datë 01.03.2018

KOMISIONERI

Besnik Dervishi

